

ԱՅԼ ԵՒ ԱՅԼՔ

Ս. ԷՋՄԻԱԾՆԻ ՀՈԳ. ՃԵՄԱՐԱՆԻ ՏՕՆԸ

Անցեալ սեպտեմբերի 25-ին, ս. Գէորգի տօնի օրը, Մայր Աթոռում կատարուեցաւ մի նշանաւոր տօնախմբութիւն—այդ օրը լրանում էր ս. Էջմիածնի Հայոց Հոգևոր ձեմարանի 25 տարին. և յօբելեանը կատարուեցաւ ընտանեկան շքեղութեամբ:

Սպասելով, որ յօբելեանական հանդէսների ընդարձակ նկարագիրը տպագրուի «Արարատ» ամսագրի էջերում, մենք այստեղ կբաւականանանք լիջելով, որ այդ օրը հաւաքուել էին Երևանից ու շրջակայքից անթիւ բազմութիւն. ստացուեցան փառաւոր ուղերձներ հայոց բոլոր թեմական դպրոցներից ու այլ հաստատութիւններից, մի քանի հարիւր հեռագիրներ շատ նշանաւոր հայագէտներից, գիտնականներից և հաստատութիւններից, անհատներից, մամուլի կողմից և վերջապէս եղան զրամական և այլ թէև շատ սակաւ նուիրաբերութիւններ: «Լուծարի խմբագրութեան կողմից հանդիսին ներկայ էր հ. հրատարակիչը:

ձեմարանի վարչութիւնը և հ. Տեսուչը ոչինչ ջանք չէին խնայել ըստ կարելոյն փառաւոր կացուցանելու այդ նուիրական հաստատութեան անդրանիկ յօբելեանը և յատկապէս այդ օրուայ համար հրատարակել էր ձեմարանի հիմնադիր երջ. Գէորգ Դ. կաթողիկոսի համառօտ կենսագրութիւնը, կազմուած ձեմ. ուսուցիչ պ. Մ. Աբեղեանի ձեռքով:

Մաղթում ենք այդ ցանկալի հաստատութեան յարատեւութիւն և շատ յօբելեաններ ու աւելի փայլուն ապագայ: